



Funded by
the European Union



Finansijska podrška za treća lica u sklopu

„Invest for Change – I4C“ projekta

**Prvi poziv za dodjelu bespovratnih sredstava
startupovima i biznisima sa pozitivnim uticajem na
društvo ili okoliš**

Implementira: Fondacija za društveno-ekonomski razvoj 787

Finansira: Europska Unija

Rok za apliciranje: 10.07.2026.

Ove Smjernice predstavljaju zvanični dokument kojim se definišu pravila, procedure, kriteriji i obaveze vezane za dodjelu bespovratnih sredstava kroz F787 Impakt fond, koji Fondacija 787 implementira u okviru projekta Invest for Change (I4C), finansiranog od strane Europske unije.

1. SKRAĆENICE

F787	Fondacija za društveno-ekonomski razvoj 787
I4C	„Invest for Change“
MSP	Mala i srednja preduzeća
EU	Europska Unija
EUR	Euro
BAM	Konvertibilna marka

2. OSNOVNE INFORMACIJE O POZIVU

Naziv poziva:	Prvi poziv za F787 Impakt fond
Ukupan budžet fonda:	261.000 EUR
Ukupan budžet prvog poziva:	100.000 EUR
Tip podrške:	Bespovratna sredstva (grantovi) kroz FSTP mehanizam za startupove i biznise iz Bosne i Hercegovine
Ciljna grupa:	Startupi i MSP sa društvenim i/ili okolišnim uticajem u Bosni i Hercegovini
Datum objave poziva:	31.05.2026.
Rok za prijave:	10.07.2026. do 23:59
Rok za dostavljanje rezultata nakon faze 1 – Administrativne provjere ispunjavanja kriterija:	Do 25.07.2026. (23:59)
Rok za sprovedbu faze 2 – „Due diligence“:	Do 09.08.2026. (23:59)
Rok za sprovedbu faze 3 – Izbor komisije:	Do 31.08.2026. (23:59)
Rok za pitanja aplikanata:	30.06.2026. (23:59)
Način prijave:	Online prijavna forma i elektronsko dostavljanje dokumentacije

3. UVOD I KONTEKST POZIVA

Fondacija za društveno-ekonomski razvoj 787 je neprofitna i nepolitička organizacija posvećena razvoju i promociji preduzetništva i startup kulture u BiH. U fokusu djelovanja Fondacije 787 su Žene i mladi koji imaju poslovnu ideju ili već osnovan biznis koji, kroz naše programe i kratkoročne aktivnosti, mogu razviti održiv posao.

Fondacija 787 u okviru projekta „Invest for Change“, uz finansijsku podršku Europske unije, pokreće Impakt fond baziran na grantovima. Projekat „Invest for Change“ implementira se u partnerstvu sa organizacijom Impact Europe (Belgija) kao vodećim partnerom, te organizacijama Partners Albania (Albanija), Innovation Centre Kosovo (Kosovo), ADP ZID (Crna Gora), ARNO (Sjeverna Makedonija) i Smart Kolektiv (Srbija).

F787 Impakt fond je namijenjen sufinansiranju bosanskohercegovačkih startupova i biznisa koji imaju jasan pozitivan uticaj na društvo i/ili okoliš, a glavni ciljevi finansijske podrške startupovima i preduzećima sa pozitivnim uticajem na društvo ili okoliš je kreiranje novih proizvoda/usluga, kreiranje novih i unaprijeđenje postojećih poslovnih modela, unaprijeđenje prodaje proizvoda ili usluga na teritoriji Bosne i Hercegovine ali i šire, te finansijska stabilnost i samostalnost startupova i preduzeća.

F787 Impakt fond vrijedan je **261.000 EUR** i u naredne **3 godine impakt startupovi i biznisi iz BiH imati će priliku aplicirati za bespovratna sredstva** za razvoj proizvoda/usluga i širenje na domaćem ali i stranom tržištu.

4. CILJEVI POZIVA

Cilj F787 Impakt fonda je jačanje i rast domaćih preduzeća sa pozitivnim uticajem na društvo ili okoliš kroz jačanje finansijske stabilnosti, poticanje zapošljavanja sa fokusom na zapošljavanje ranjivih kategorija, te pružanje mentorske podrške za nastavak razvoja i širenja pozitivnog uticaja na teritoriji Bosne i Hercegovine, ali i regiona i Europske Unije.

Fokus finansijskog osnaživanja domaćih preduzeća sa pozitivnih uticajem na društvo ili okoliš biti će:

- razvoj inovativnih proizvoda i usluga;
- razvoj održivih poslovnih modela;
- podršku društvenom i okolišnom uticaju;
- razvoj zelenih i digitalnih rješenja;

- povećanje zapošljavanja (sa naglaskom na zapošljavanje ugroženih grupa);
- unaprijeđenje finansijske održivosti;
- internacionalizaciju poslovanja;
- doprinos ciljevima održivog razvoja (SDGs).

5. INFORMACIJE O BESPOVRATNIM SREDSTVIMA

a. Iznosi grantova

F787 Impakt fond će za impakt startupove i biznise iz BiH obezbijediti različite iznose grantova u zavisnosti od faze razvoja startupa/biznisa i potreba za investicijom.

Startupovi i MSP u fazi ideacije	5.000 – 10.000 EUR
Startupovi i MSP u ranoj fazi razvoja	10.000 – 30.000 EUR
Startupovi i MSP u fazi rasta i skaliranja	30.000 – 60.000 EUR

b. Sufinansiranje

F787 Impakt fond je namijenjen sufinansiranju startupova i MSP sa pozitivnim uticajem na društvo ili okoliš, te je jedan od uslova osiguravanje drugih izvora finansiranja od strane aplikantata. Drugi izvori finansiranja koji su prihvatljivi za ispunjavanje uslova F787 Impakt fonda su:

- investicije fizičkih lica (anđela investitora)
- investicije pravnih lica (SPV ili VC fond)
- grantovi drugih organizacija

Izvori finansiranja koji neće biti prihvatljivi za ispunjavanje uslova za sufinansiranje F787 Impakt fonda su:

- Vlastita sredstva osnivača startupa/MSP;
- Finansijska sredstva političkih organizacija;
- Finansijska sredstva kompanija i organizacija čije su primarne aktivnosti proizvodnja i distribucija duhana, duhanskih proizvoda, alkohola, oružja, municije i vojne opreme;

- Finansijska sredstva kompanija i organizacija čije su primarne aktivnosti kockanje i igre na sreću;

Startupovi i MSP moraju osigurati dodatna finansijska sredstva (investiciju ili bespovratna sredstva drugih organizacija), neovisno o iznosu dodatnih sredstava, u periodu od maksimalno 3 mjeseca prije apliciranja za bespovratna sredstva F787 Impakt fonda, kako bi grant F787 Impakt fonda bio isplaćen.

c. Trajanje projekata

„Invest for Change“ projekat je četverogodišnji projekat koji će trajati do 28 februara 2029. godine. **Period trajanja prvog poziva i sprovođenja prvog ciklusa finansijske podrške startupovima i biznisima koji rješavaju ekološke ili društvene probleme je 1 godina i 3 mjeseca**, a ovaj period uključuje objavu poziva za dodjelu bespovratnih sredstava, vrijeme predviđeno za prijave, proces selekcije, te dodjelu bespovratnih sredstava sa rokom pravdanja utroška sredstava u trajanju od maksimalno 12 mjeseci. Ukupan iznos bespovratnih sredstava namijenjen za prvi ciklus finansijske podrške je **100.000 EUR**. U sklopu prvog ciklusa finansijske podrške, postoji razlika u dužini trajanja finansijske podrške prema iznosu bespovratna sredstava.

- Svaki startup ili MSP će imati maksimalno 6 mjeseci za utošak grantova u iznosu do 30.000 EUR;
- Svaki startup ili MSP će imati maksimalno 12 mjeseci za utošak grantova u iznosu od 30.000 EUR do 60.000 EUR.

d. Isplata bespovratnih sredstava

Bespovratna sredstva F787 Impakt fonda biti će isplaćena u dvije tranše. Prva tranša se isplaćuje u roku od 30 dana nakon potpisivanja ugovora između startupa/MSP i Fondacije 787. U ugovoru će biti definisani međuciljevi, čije ispunjavanje će biti uslov za isplatu druge tranše bespovratnih sredstava. Ciljevi će biti definisani i kreirani na osnovu potreba i mogućnosti aplikanta, te će svaki startup ili MSP imati ciljeve koji su prilagođeni upravo tom startupu/MSP, te će isti biti navedeni u ugovoru između startupa/MSP i Fondacije 787.

1. 50% bespovratnih sredstava nakon potpisivanja ugovora i početka implementacije
2. 50% bespovratnih sredstava, tokom perioda implementacije, a nakon ispunjavanja međuciljeva definisanih ugovorom.

Bespovratna sredstva će biti isplaćena startupovima i MSP sa najboljim ocjenama komisije za dodjelu bespovratnih sredstava do ukupnog iznosa od 100.000 EUR (ukupnog budžeta prvog poziva za bespovratna sredstva).

Isplata bespovratnih sredstava će se vršiti u konvertibilnim markama (BAM) u iznosu koji odgovara vrijednosti u EUR na dan isplate, obračunato prema važećem kursu iz EUR u BAM.

6. KRITERIJI ZA PRIJAVU NA PRVI POZIV ZA DODJELU BESPOVRATNIH SREDSTAVA

Sljedeći kriteriji prihvatljivosti definišu uslove koji moraju biti ispunjeni kako bi prijava bila uzeta u razmatranje za finansijsku podršku F787 Impakt fonda.

Aplikanti su obavezni pažljivo pregledati i osigurati potpunu usklađenost sa svim uslovima prihvatljivosti prije podnošenja prijave, jer neispunjavanje bilo kojeg od navedenih uslova može dovesti do diskvalifikacije iz procesa selekcije.

Prihvatljivi aplikanti su:

- da su registrovana pravna lica, odnosno mikro, mala ili srednja preduzeća (MSP) usmjerena na ostvarivanje pozitivnog društvenog ili ekološkog uticaja;
- da apliciraju kao pojedinačni subjekt (konzorciji nisu prihvatljivi u okviru ovog Poziva);
- da su registrovani u nadležnom registru prije objave poziva za dodjelu bespovratnih sredstava;
- da imaju osigurano sufinansiranje kroz druge prihvatljive izvore kao što su investicije ili bespovratna sredstva drugih organizacija;
- da nemaju neizmirenih poreskih obaveza prema državnim i lokalnim institucijama;
- da su direktno odgovorni za pripremu i implementaciju aktivnosti navedenih u prijavi.

Potencijalni aplikanti nisu prihvatljivi za dodjelu bespovratnih sredstava u okviru I4C projekta ukoliko:

- su u stečaju, pod sudskom upravom, imaju sporazum sa povjericima, obustavili su poslovne aktivnosti, predmet su postupaka vezanih za navedene situacije ili se nalaze u sličnoj situaciji predviđenoj nacionalnim zakonodavstvom;
- su pravosnažno osuđeni za krivično djelo povezano sa profesionalnim postupanjem, odnosno presudom protiv koje nije moguće uložiti žalbu;
- su odgovorni za ozbiljan profesionalni propust dokazan na bilo koji način;
- su pravosnažno osuđeni za prevaru, korupciju, učešće u kriminalnoj organizaciji ili bilo koju drugu nezakonitu aktivnost štetnu po nacionalne finansijske interese;
- su proglašeni odgovornim za ozbiljno kršenje ugovora zbog neispunjavanja ugovornih obaveza u vezi sa postupcima javne nabavke ili drugim procedurama dodjele grantova finansiranih iz državnog budžeta ili od strane međunarodnih donatora;
- imaju sukob interesa; sukob interesa podrazumijeva bilo koju okolnost koja može uticati na proces evaluacije ili implementacije na objektivan i nepristrasan način. Takve okolnosti mogu proizaći iz ekonomskih interesa, političkih ili nacionalnih preferencija ili porodičnih veza;
- dostavili su netačne ili obmanjujuće informacije tražene od strane I4C projektnog tima;
- nisu dostavili informacije potrebne kao uslov za učešće u Pozivu;
- pokušali su pribaviti povjerljive informacije ili uticati na evaluatore tokom procesa ocjenjivanja prijave;
- ne ispunjavaju standardne zahtjeve u vezi sa platama ili ne prihvataju principe dostojanstvenog rada (odnosno ne osiguravaju produktivan rad za žene i muškarce u uslovima slobode, jednakosti, sigurnosti i ljudskog dostojanstva);
- predstavljaju subjekte za koje je utvrđeno da su u prošlosti zloupotrijebili donatorska ili javna sredstva;
- predstavljaju političke partije, političke grupe, institucije, kao ni njihove podružnice ili povezana lica;

- zagovaraju, promovišu ili podržavaju antidemokratske politike ili nezakonite aktivnosti;
- imaju diskriminatorne ili vjerske ciljeve, odnosno ukoliko je osnovna svrha bespovratnih sredstava religijske prirode.

Aplikant može uključiti partnere, konsultante, dobavljače ili vanjske saradnike za implementaciju određenih aktivnosti, ali ostaje jedini odgovoran prema Fondaciji 787.

7. PRIHVATLJIVE AKTIVNOSTI

Sljedeća lista daje primjere prihvatljivih aktivnosti unutar I4C projekta i aktivnosti koje će biti prihvatljive za F787 Impakt fond (lista nije konačna):

- razvoj novih proizvoda i/ili usluga kroz nova i inovativna rješenja;
- unaprijeđenje i poboljšanje postojećih poslovnih modela i radnih procesa ili razvoj novih modela i procesa koji doprinose rastu i skaliranju poslovanja;
- unaprijeđenje proizvodnih procesa – nabavka i/ili razvoj opreme i softvera za tehnološki napredak

**Napomena: ukoliko postoji opravdanje poput cijene, mogućnosti kupovine i slično, dozvoljena je kupovina korištene opreme od pravnog lica.*

**Napomena: kupljena oprema ne može biti predmet prenosa vlasništva najmanje dvije godine nakon isteka perioda važenja ugovora o grantu.*

**Napomena: kupljena oprema ne može biti založena kao garancija za kredit najmanje dvije godine nakon isteka perioda važenja ugovora o grantu;*

- razvoj novih energetski efikasnih rješenja;
- druge aktivnosti.

Sljedeće vrste aktivnosti nisu prihvatljive za finansiranje u okviru I4C projekta:

- aktivnosti koje ugrožavaju okoliš;

- aktivnosti koje se isključivo ili pretežno odnose na individualna sponzorstva za učešće na radionicama, praksama, stručnim kursevima, seminarima, konferencijama i kongresima;
- aktivnosti koje se isključivo ili pretežno odnose na individualne stipendije za školovanje;
- aktivnosti povezane sa političkim partijama;
- aktivnosti koje spadaju u redovne nadležnosti državnih institucija ili organa javne uprave, uključujući lokalnu samoupravu;
- aktivnosti koje se svode isključivo na humanitarne ili dobrotvorne donacije;
- humanitarne aktivnosti;
- aktivnosti koje nisu povezane sa osnovnom djelatnosti pravnog lica;
- aktivnosti povezane sa alkoholom, duhanom ili kockanjem.

8. PRIHVATLJIVI I NEPRIHVATLJIVI TROŠKOVI

Svi troškovi navedeni u budžetu koji će biti sastavni dio ugovora između Fondacije 787 i aplikanta moraju biti:

- da su nastali tokom perioda implementacije aktivnosti za koje su dobijena bespovratna sredstva;
- da su u skladu sa budžetom navedenim u ugovoru;
- da su neophodni za implementaciju poslovne ideje koja je predmet finansijske podrške ;
- da su prepoznatljivi, provjerljivi i dokumentovani (npr. ugovor, faktura, narudžbenica), te posebno evidentirani u računovodstvenim evidencijama korisnika bespovratnih sredstava i usklađeni sa važećim računovodstvenim standardima;
- da su usklađeni sa zahtjevima važećeg poreskog i zakonodavstva iz oblasti socijalnog osiguranja;

- da su razumni, opravdani i u skladu sa principima dobrog finansijskog upravljanja, naročito u pogledu ekonomičnosti i efikasnosti;
- da nisu navedeni kao neprihvatljivi troškovi;
- da se odnose na troškove transporta, instalacije, garancije tokom perioda implementacije i obuke zaposlenih za korištenje kupljene opreme.

Sljedeći troškovi nisu prihvatljivi:

- carinske dažbine;
- dugovi i troškovi servisiranja dugova (kamate);
- rezervisanja za gubitke ili potencijalne buduće obaveze;
- kupovina zemljišta ili objekata;
- kupovina vozila i mobilnih telefona. Ovakvi troškovi mogu biti prihvaćeni samo ukoliko su od ključnog značaja za implementaciju projekta;
- gubici nastali usljed kursnih razlika;
- troškovi bankarskih garancija ili drugih vrsta garancija;
- kreditiranje trećih lica;
- kazne, finansijske penale i troškovi pravnih sporova i sudskih postupaka;
- troškovi leasinga;
- proizvodi ili usluge iz sektora koji nisu prihvatljivi u skladu sa praksama Evropske unije (proizvodnja alkohola, duhana, kockanje, vojna industrija).

9. PROCES PRIJAVE ZA BESPOVRATNA SREDSTVA, DOKUMENTACIJA I

KRITERIJI

Prijave se podnose isključivo online putem Google forme koju možete pronaći na [ovom linku](#), a jedan aplikant može podnijeti najviše jednu (1) prijavu u okviru prvog poziva za bespovratna sredstva F787 Impakt fonda.

Napomena: Nakon podnošenja prijave, nije moguće pristupiti prijavi niti vršiti izmjene. Nepotpune prijave će biti odbijene.

Prijave se prihvataju isključivo na bosanskom jeziku kako bi se omogućio transparentan proces selekcije.

Svaka greška ili značajno odstupanje u odnosu na tačke navedene u instrukcijama prijavnog obrasca mogu dovesti do odbijanja prijave.

Pojašnjenja će biti tražena samo u slučajevima kada su dostavljene informacije nejasne i onemogućavaju objektivnu procjenu od strane davaoca bespovratnih sredstava sredstava.

Uz prijavnu formu, svi aplikanti biti će dužni popuniti pre-test. Svi aplikanti koji ne popune pre-test automatski neće ispuniti uslove za dodjelu bespovratnih sredstava. Pre-test možete pronaći [ovdje](#), a potrebno ga je ispuniti isti dan kada je ispunjena i predana prijavna forma.

Projektni prijedlog mora biti pripremljen u skladu sa smjernicama za prijavu i objavljenim formatima. Od izuzetne je važnosti da dokumentacija sadrži sve relevantne informacije o predloženom projektu.

Dokumentacija koju je potrebno dostaviti u sklopu prijavne forme je sljedeća:

- Uvjerenje o registraciji pravnog lica sa jasno vidljivim ID brojem- skenirano u PDF formatu;
- [Business Model Canvas](#) (Platno poslovnog modela) – popunjen na bosanskom jeziku, konvertovan i dostavljen u PDF formatu;
- [Indikativni akcioni plan](#) – popunjen, konvertovan i dostavljen u PDF formatu.

Drugi formati ili template-i neće biti prihvaćeni.

Pored navedenog, aplikanti su obavezni dostaviti i sljedeću dokumentaciju vezanu za pravno lice na zahtjev Fondacije 787:

- Dokumentaciju koja dokazuje osiguravanje drugih izvora finansiranja (grantova, investicija) - kao što su: ugovori o donaciji, ugovori sa investitorima o kupovini/prodaji vlasničkog udjela, bankovni izvodi koji dokazuju transakciju, te druga dokumentacija koja može pomoći u dokazivanju osiguravanja drugih izvora finansiranja.
- posljednje finansijske izvještaje (bilans uspjeha i bilans stanja) ili posljednju pojednostavljenu poresku prijavu, prema potrebi, ovjerene od strane Poreske uprave – skenirane u PDF formatu;

- potvrdu o izmirenim poreskim obavezama, sa datumom izdavanja nakon objave ovog Poziva– u PDF formatu.

Aplikanti će biti obavezni, na zahtjev Fondacije 787, dostaviti sljedeću dokumentaciju vezanu za fizička lica uključena u rad pravnog lica:

- CV ključnog osoblja (Vlasnika/suvlasnika)– objedinjene u jedan PDF dokument;
- Uvjerenje o nekažnjavanju - skenirano uvjerenje u PDF formatu i original na adresu Fondacije 787;
- Uvjerenje o nevođenju krivičnog postupka - skenirano uvjerenje u PDF formatu i original na adresu Fondacije 787;
- Uvjerenje o izmirenim obavezama po osnovu poreza i doprinosa - skenirano uvjerenje u PDF formatu i original na adresu Fondacije 787.

Alternativna dokumentacija koja nije navedena iznad neće biti uzeta u razmatranje.

10. PROCES SELEKCIJE I EVALUACIJE ZAPRIMLJENIH PRIJAVA

Nakon popunjavanja prijavnice forme i dostavljanja potrebne dokumentacije, proces selekcije startupova i MSP kojima će biti dodijeljena bespovratna sredstva će se odvijati u četiri faze, a to su:

FAZA 1 – Administrativna provjera ispunjavanja kriterija

U ovoj fazi će se vršiti provjera kompletnosti dokumentacije i da li aplikant ispunjava kriterije za dodjelu bespovratnih sredstava. Sva potrebna dokumentacija mora biti dostavljena u formatima navedenim ranije i prema dostupnim detaljnim instrukcijama.

Ova faza će rezultirati sa listom svih startupova i MSP koji ispunjavaju uslove za bespovratna sredstva.

Svi aplikanti koji nisu ispunili administrativne uslove će biti **obaviješteni o rezultatima procesa selekcije u roku od 15 dana nakon zatvaranja poziva.**

FAZA 2 – Due diligence i kreiranje budžeta za utrošak bespovratnih sredstava

Provjera prijavljenih startupova i biznisa kako bi se utvrdilo da li su sve dostavljene

informacije tokom apliciranja tačne. U ovoj fazi tim Fondacije 787 može tražiti od aplikanata da dostave dodatnu dokumentaciju, navedenu ranije, vezanu za pravno lice ili osnivače pravnog lica, te direktno uključene u rad pravnog lica. Tim Fondacije 787, će u ovoj fazi organizovati dva do tri poziva sa svim aplikantima koji ispunjavaju uslove kako bi provjerili potrebu za bespovratnim sredstvima, te kako bi zajedno sa aplikantom kreirali detaljan plan aktivnosti za period implementacije, kreirali budžet za utrošak bespovratnih sredstava, te definisali finalni iznos potrebnih bespovratnih sredstava. Kreirani budžet za utrošak sredstava biti će sastavni dio ugovora između Fondacije 787 i startupa/MSP.

Rok za sprovedbu ove faze je 30 dana od zatvaranja poziva.

FAZA 3 – Selekcija komisije za dodjelu bespovratnih sredstava

Nakon procesa provjere (due diligence) svakog startupa i MSP koji ispunjava uslove za bespovratna sredstva, tročlana komisija F787 Impakt fonda sačinjena od predstavnika Fondacije 787, te dva eksterna saradnika, ocjenjivati će startupove i MSP na osnovu kriterija za evaluaciju (11. Kriteriji evaluacija). Individualne ocjene komisije za svaki kriterij evaluacije biti će sumirane u jedan konačni rezultat na osnovu kojeg će biti izabrani startupovi i MSP kojima će biti dodijeljena bespovratna sredstva.

Komisija će se sastati radi evaluacije prijavljenih startupova i MSP ***u roku od 15 dana nakon „due diligence“ procesa i kreiranja budžeta sa svakim prijavljenim startupom/MSP koji je ispunio uslove.***

Najbolje ocjenjeni startupovi i MSP biti će izabrani za dodjelu bespovratnih sredstava, u ukupnom iznosu ne većem od budžeta prvog poziva za bespovratna sredstva (100.000 EUR).

Svi startupovi i MSP koji su bili u procesu selekcije biti će obaviješteni o rezultatima selekcije putem maila u roku od 7 dana nakon što komisija donese odluku o startupovima i MSP kojima će biti dodijeljena bespovratna sredstva.

FAZA 4 – Potpisivanje ugovora

Nakon javljanja rezultata selekcije, Fondacija 787 i izabrani startupovi i MSP pristupaju potpisivanju ugovora na osnovu kojeg će biti isplaćena prva tranša bespovratnih sredstava, te definisani uslovi, prava, obaveze, te aktivnosti i ciljevi za period implementacije i utroška bespovratnih sredstava.

Ugovor će definisati i međuciljeve tokom perioda utroška bespovratnih sredstava, čije će ispunjavanje biti osnov za isplatu druge tranše bespovratnih sredstava.

11. KRITERIJI EVALUACIJE

Svaki startup i MSP će nakon ispunjavanja uslova za dobijanje bespovratnih sredstava i nakon provjere da su sve dostavljene informacije tačne, biti evaluiran od strane tročlanog žirija (detaljno objašnjeno u stavci 3 poziva). Startupovi i MSP će biti evaluirani na osnovu sljedećih kriterija, te će bespovratna sredstva biti dodijeljena najbolje ocjenjenim startupovima ili MSP prema dostupnom budžetu za prvi poziv F787 Impakt fonda:

Kriterij	Maksimalan broj bodova
Jasnoća poslovnog modela	15
Skalabilnost poslovnog modela	15
Potencijal za zapošljavanje	10
Potencijal za zapošljavanje ranjivih grupa	10
Potreba za investicijom	10
Iskoristivost bespovratnih sredstava	10
Definisan način mjerenja pozitivnog uticaja	10
Kvalitet startup/MSP tima	10
Učešće u programu/ima Fondacije 787	7
Učešće u drugim preduzetničkim programima	3

12. JAČANJE KAPACITETA MSP I STARTUPOVA SA POZITIVNIM UTICAJEM NA DRUŠTVO ILI OKOLIŠ

Pored finansijske podrške, svi startupovi i MSP odabrani za finansiranje kroz F787 Impakt fond biće obavezni učestvovati u programu jačanja kapaciteta koji će Fondacija 787 implementirati tokom perioda realizacije grant projekta i pravdanja bespovratnih sredstava.

Program podrške uključivati će mjesečne interaktivne radionice sa ciljem pružanja dodatne stručne i operativne podrške startupovima i MSP kako bi:

- što efikasnije implementirali projektne aktivnosti;
- adekvatno upravljali bespovratnim sredstvima;
- unaprijedili interne poslovne kapacitete;
- razvili održive poslovne modele;
- povećali društveni i/ili okolišni uticaj;
- unaprijedili procese izvještavanja, monitoringa i finansijskog upravljanja.

Planirane radionice obrađivati će teme relevantne za rast i razvoj startupova i MSP. Teme radionica biti će određene naknadno, na osnovu potreba startupova i MSP.

Startupovi i MSP kojima budu dodijeljena bespovratna sredstva u iznosu do 30.000 EUR imati će period implementacije i izvještavanja do 6 mjeseci, te će tokom implementacije imati obezbijeđeno maksimalno 6 interaktivnih radionica za jačanje kapaciteta.

Startupovi i MSP kojima budu dodijeljena bespovratna sredstva u iznosu iznad 30.000 EUR imati će period implementacije do 12 mjeseci, te će tokom implementacije imati obezbijeđeno maksimalno 12 interaktivnih radionica za jačanje kapaciteta.

Radionice će se organizovati online i uživo, u zavisnosti od rasporeda drugih aktivnosti Fondacije 787, dostupnosti i prebivališta predavača. Vrijeme trajanja svake individualne radionice je 1.5 sati.

Fondacija 787 zadržava pravo evidentiranja prisustva i aktivnog učešća korisnika grantova na radionicama, a redovno učešće može predstavljati dio ugovornih obaveza korisnika bespovratnih sredstava.

13. MONITORING I IZVJEŠTAVANJE

Fondacija 787 će od svih startupova i MSP koji dobiju bespovratna sredstva zahtijevati:

- narativni izvještaj;
- finansijski izvještaj;
- dodatnu dokumentaciju za pravdanje troškova
- prije i poslije testiranje kojim će se mjeriti promjene u znanju i vještinama društvenih poduzeća stečenim kroz program jačanja kapaciteta.

U ugovoru između Fondacije 787 i startupa ili MSP koji dobije bespovratna sredstva biti će definisani:

- međuciljevi koji su uslov za isplatu druge tranše bespovratnih sredstava
- rok za ispunjavanje međuciljeva

- Ciljevi na kraju perioda za utrošak bespovratnih sredstava
- Template narativnog izvještaja
- Template finansijskog izvještaja
- Rok za dostavljanje narativnog i finansijskog izvještaja
- Informacije o dodatnoj dokumentaciji koja je potrebna za pravdanje troškova
- Rok za dostavljanje dodatne dokumentacije

Korisnici grantova obavezni su čuvati kompletnu projektnu i finansijsku dokumentaciju najmanje 5 godina nakon završetka projekta.

14. KOMUNIKACIJSKE OBAVEZE

Korisnici bespovratnih sredstava obavezni su jasno naznačiti da su aktivnosti, za koje su utrošena bespovratna sredstva F787 Impakt fonda, finansirane od strane Europske unije.

EU logo i reference na finansiranje od strane Europske Unije moraju biti korišteni na:

- web stranicama;
- društvenim mrežama;
- promotivnim materijalima;
- događajima;
- publikacijama;
- prezentacijama;
- medijskim objavama.

Fondacija 787 će svim startupovima i MSP koji budu izabrani za bespovratna sredstva F787 Impakt fonda dostaviti dodatne detaljne „Visibility Guidelines“.

Nepoštivanje ovih pravila može rezultirati finansijskim korekcijama i nepriznavanjem troškova.

15. PITANJA ZA BESPOVRATNA SREDSTVA F787 IMPAKT FONDA

Svi zainteresirani za prijavu na poziv za dodjelu bespovratnih sredstava F787 Impakt fonda, koji imaju pitanja vezana za proces prijave, kriterije ili druge detalje vezane za poziv, svoja pitanja mogu poslati na denis@f787.ba do 25.06.2026. nakon čega će sva zaprimljena pitanja, kao i odgovori, biti objavljeni na Instagram i LinkedIn profilu Fondacije 787 do 30.06.2026. godine.

16. ŽALBE

Svaki aplikant ima pravo na žalbu u roku od 5 dana od dana dobijanja rezultata selekcije.

Rok za odgovor F787 Impakt fond tima na žalbu je 5 radnih dana.

17.ZAŠTITA PODATAKA

Svi lični podaci i podaci organizacija (preduzeća i startupova) dostavljeni u okviru ovog Poziva biće obrađivani isključivo u svrhu evaluacije, u skladu sa važećim pravilima o zaštiti podataka. Aplikanti su odgovorni da osiguraju da su sve dostavljene informacije tačne, potpune i zakonite za dijeljenje.

Fondacija 787 će sa komercijalno osjetljivim informacijama postupati povjerljivo, ne dovodeći u pitanje obaveze u pogledu revizije, izvještavanja, sprečavanja prevara i transparentnosti koje se primjenjuju na aktivnosti finansirane od strane Evropske unije.